



Tir Yimiyim

www.tiryimiyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :



Tir Yimiyim



tiryimiyim@aolima



tir yimiyim

TAPAK 7

Taoba Arsenal & Everton striker Campbell süogo

Putin-i Ukraine nung rara anentsü atema takhangba kar agütsü

VOL. XXI ISSUE NO. 244 (ADOK 244)

DIMAPUR AMUNGNÜ (SUNDAY)

AAMI (JUNE) 16, 2024

₹ 5.00

ULBs election atema kulikakettem metetdaksür

Dimapur, June 15, 2024 (TYO): State Election Commission-i Nagaland Municipal aser Town Council Election, 2024 nung voters maitsü jangjatsü atema kulikaket amshitsüba osang metetdaksüogo.

State Election Commissioner T. John Longkumer, IPS (Retd)-i tanü sangdong ka nung polling station nung Presiding Officer-i maitsü jangjatsü atema kukikattem amshitsüba osang metetdaksüogo.

Shia aliba kulikakettem kar kibong nung tekolak ket nung dang lira, par kibong nung züngsemtem jangjatsü atema amshitsü akok. Kasaji kibong nung tanga züngsem kar indang kulikaket dang lira, tanüngba züngsemtem jangjatsü atema amshitsü akok, ta SEC-i ashi.

Electoral roll nung nisung tenüng, tetsü/tebu/kinungbo tenüng, arishi küm mesüra address amala nung aibelen

mesüra metokmeperi ali nunga electoral roll nung tenüng aliba jangjara aser Presiding Officer mesüra Polling Officer-i agizükra, vote enoktsüsü akok ta SEC-isa metetdaksü.

State Election Commission-i lateta agütsüba kulikaket mabener nem vote meinokdaksütsü, ta paisa ashi.

Kulikakettem:

- (i) Indian Passport;
- (ii) Driving License;
- (iii) Aadhar Card
- (iv) Service Identity Card issued to its employee by the State/Central Government, Public Sector Undertaking, Public Limited Companies;
- (v) Bank/Post Office Pass Book with photograph;
- (vi) Pan Card;
- (vii) Pension Document with photograph;
- (viii) Indigenous Inhabitant Certificate issued by the Deputy Commissioner/Additional Deputy Commissioner.

DMC: INC candidate Akokla aser NDPP candidate Lanuchuba na election-i aiba sangdongogo

Dimapur, June 15, 2024 (TYO): Dimapur Municipal Council (DMC) kübok ward ajak agi 23 lir aser candidate temi nomination asüba sülen candidature declaration asüba sentong agiyonga arudar.

June 15, 2024 aepdang 11:00 ako nung Ward-13 (R) nungi INC candidate Wt. Akokla Pongen Lucy election-i aiba sangdongba sentong ka ayonga agiogo.

Iba sentong ya SM College Auditorium nung agi aser tawa Lok Sabha election nung takok angur Nagaland MP Supongmeren Jamir-ia shilem agia liasü.

"Mapang talangka tetsür nem shilem 33 lemezükja ULBs election agitsü ataa aruogo aser tanü ibaji agitsü mapang tonga aruogo. Iba election nung shilem agitetsüsa Tsüngremi moatsüba atema kanga pelar" ta Wt. Akokla-i ashi.

"ULB kübok kilentzü ayimdak, gari lenmang, jana anepalua endokba maparen ya tasen masü saka tang dang nungi tajungba inyaka aotsü nüngdaker. Talisa yimti tobur jungdaksüba mapa nung tetsür medeni inyaka moutettsü aser tetsürtem shilem tulu lir" ta lai ashi.

"Ward-13 ya Dimapur tiyongtsü nung lir aser asenoki iba ward tobur junga kümdaksüra Dimapur yimti tobur tajungba akümtsü. Anungji ward nung alirtemi shisa kaa candidate shitak nem vote agüja takok ngudaksütsü ayongzüker"

ta Wt. Akokla-isa ashi.

"Nenoki kü nem takok ngudaksüra, council, tetsürtem aser lanurtem ajak külemi yaritepa ajaklen terenlok mapa inyaka aotsü" ta laisa shisem.

Külen, tanü nikongdang 3:00 ako nungi Ward-20 nung NDPP candidate Wb. Lanuchuba indang candidature declaration cum prayer program ka ayongzüka agiogo.

Iba sentong nung Dimapur II nungi MLA aser Labour & Employment, Skill Development & Entrepreneurship, & Excise Department, GoN Advisor Wb. Moatoshi Longkumer aden.

"Ward 20 nung kü nem NDPP magütsüsü kanga merang saka MLA & Advisor Moatoshi-i kanga meranga jembia kü nem ticket meshizüksüba atema kanga pelar" ta Wb. Lanuchuba-i ashi.

"Asenok dang longjema lira takok angutsü aser iba sülen colony ajak nung chairman aser council members den angatettepa aser asüngdangtepa maparen inyaka aotsü" ta pai ashi.

"Ward 20 nung kin balala temeyoktep lir aser ni Aor ka lir saka ni Aor candidate masü. Ni Ward 20 atema noktaker aser Ward 20 indang candidate lir. Election-i aitsü ta ser mapa tenzükdang ni kin telemsa yur mesüra telok balala lemsar mapa metenzük. Ni Ward 20 candidate ka aser yamaji dang kin telemsa kecha meyui inyaka aotsü" W. Lanuchuba-i tesentepertem ayongzüker.

Dimapur aser Chumoükedima atema ADIP camp agi



Dimapur, June 15, 2024 (TYO): District Disability Rehabilitation Centre (DDRC), Dimapur-i Artificial Limbs Manufacturing Corporation of India (ALIMCO), Guwahati den yaritepa matamabensartem atema sentong ka agiogo.

June 15, 2024 nü Chapel Hall, District Hospital Dimapur nung Assistance to Disabled Persons for Purchasing/Fitting of Aids/Appliances (ADIP) scheme indang sentong ayonga agi.

Iba sentong ya District Administration, Dimapur aser

National Career Service Centre for Differently Aabled, Dimapur ajanga yaritepa nungit.

Sentong nung Dimapur Deputy Commissioner aser District Management Team (DMT), DDRC Dimapur Chairman Dr. Tinojongshi Chang, NCS aden.

"Asenoki matamabensartem yaritsüla aser parnok taküm tajungba kümdaksü merangtsüla. Parnok yaria arurtem dang pelar aser sorkaria facilities aika agütsür. District Hospital, Dimapur nung specialized board ka lir aser parnok nungi disability

certificate agizüksü ayongzüker" ta Dr. Tinojongshi-i ashi.

Sentong nung mendenji District Disability Rehabilitation Centre (DDRC), Dimapur Senior Specialist In-Charge Dr. Imlitemsu Ozukum, MD (PMR) liasü.

Pai ADIP scheme ajanga nüngdabapurtem yariba osang lemsatepdang "Dimapur aser Chumoükedima nung matamabensar 125 jangjateta liasü aser parnok nem assistive aids, including smartphones, crutches, wheelchairs & hearing aids 181 tashi agütsüogo" ta ashi.

NPCC-i Tuli candidate asem nem tenüngsang agütsür

Dimapur, June 15, 2024 (TYO): Tuli Town Council nung Congress candidate asem den tetokteper mali takok anguba atema Nagaland Pradesh Congress Committee (NPCC)-i tenüngsang agütsüogo.

Par asem ya Ward No-5 (Tuliyong Ward) nungi Imlionen Longkumer, Ward No-6 (Mendenti Ward) nungi

Temsumenba Imsong aser Ward No-8 (Longpong Ward) nungi K. Imlitemjen Jamir nunger lir.

"Tuli Town nung alirtemi ozü party candidate dak temulung alemba atema kanga pelar. Lok Sabha election nung ozü party nem takok tulu ngudaksüba sülen yamai inyakba atema pelar" ta Communications Department,

NPCC-i sangdong ka nung ashi.

Congress dak tamang akaba vote pelashishia agizüker aser ano Urban Local Body Elections nung maneni takoktem ngua aotsü imlar. Tuli Town Council nung Councillor asemi pei pei ward aser town nung temelenshi tajungtem bener arutsüsa inyaka aotsü moatsür ta NPCC-isa metetdaksü.

Doyang ayong nung jana meindoktsü tuyur: Pughoboto ADC

Dimapur, June 15, 2024 (TYO): Zunheboto kübok Pughoboto Sub-Division nung Tapu (Doyang) River aser iba ayong yimokba Tsuvi, Kucho, Thaghu, Tsuli o Yeti ayongnutem nung jana meindoktsü tetuyuba agütsüogo.

Pughoboto Additional Deputy Commissioner-i iba 'Ban and

Prohibit' sangdong agütsü.

Sorkar department balalai tawa 'Clean Doyang Mission' inyakba sülen iba tetuyuba agütsür. Doyang River nung Plastic aser raksa maoba janatem bener alua Doyang Reservoir nung bendenba atema 'Mission Mode' cleaning inyaka liasü.

Jana endokba ajanga ayong

menener aser iba ajanga timtem aika ajurur ta angateta District Administration-i Pughoboto kübok jila aser yimtsüng ajak dang Tapu (Doyang) River nung jana meindoktsü metetdaksüogo.

Pughoboto Sub-Division kübok Tapu (Doyang) River menentsüsa mapa inyakerem merenshitsu ta parnokisa ashi.

Ochishia inyaktsü tebilemba lir: Imlikumzük Kichu

Mokokchung, June/Aami 15(TYO): Wb. Imlikumzük Kichu Alongmen Ward Mokokchung nungi ULB election nung NDPP candidate ka ama tokteptsü sangdongba sentong tanu Alongmen Ward nung par kidang mera ket keta agiogo.

Mokokchung Municipal Council(MMC) kübok Alongmen Ward ya 25th Mongoya Assembly Constituency kübok alinung Wb. Imlikumzük Kichu nem NDPP akhüm aser temoatsü agüja tanu 25th Mongoya AC President Wb. Yimya-i NDPP tenüng nung NDPP wako

atsükettsür kelen sentongtem tarensena agia liasü.

Setong nung NDPP Canditate Wb. Imlikumzük Kichu-i pa ULB election nung toktepa nükjidong aser tebilemba lemsatepba mapang nung Alongmen ward nung soa inteter lia arudang lanuwa nungi tebu tambo J. Maputemjen EX.MTC Member aser ano tebu Imsümeren Ex.MTC Member parnoki inyaka toktsüba tsüngsü mesamadaksüi Alongmen Ward ano tali tajungba nung ajungketa renloka aotsüsa inyaktsü aser ibaji ajanga Mokokchung tali

tajungba kümdaksütsü temelungtetba lirta ashi.

Naga lima nung ULB election agitsüta ita ishika tejaklen sangdonger kelen Alongmen Ward nübur meyonga inyaktsü asoshi ULB election nung tokteptsü mulungteter kelen Alongmen Ward nung aliba nüburtem den ajurutepa shisatsü agia lemsatepa arudagi aser tang tashi nung tangatetba tajung nung pei-i akokba maparen ajak nung yaritepa aruba asoshi teyariteper ajak dang pelaba Wb. Imlikumzük Kichu-i lemsatep.

(Maneni tapak 2 nung...)

Nagaland Governor-i Bharat Ko Janno & Border Area Programme tenzüksü



Dimapur, June 15, 2024 (TYO): Nagaland Governor aser Chairman, NEZCC La Ganesan-i June 14 nü Bharat Ko Janno Programme tenzüksüogö.

La Ganesan-i Manan Kendra, Gangtok, Sikkim nung iba sentong tenzüksü.

"Bharat Janno Programme ajanga asenoki linük nung sobaliba senmang temeyoktep atema benjungteper. Ministry of Culture, Government of India kübok North East Zone Cultural Centre-i iba benjung tulu ayongzükba atema tenüngsang agütsür" ta Governor Ganesan-i ashi.

"Bharat Janno Programme

ajanga linük longjema aliba aser sobaliba temeyoktep aliba kuli agütsür. Discover India ama sentongtem ajanga asenoki sobaliba ajanga arrtsülen alirtem sendakteptsü meranger aser iba ya sobaliba balala angatetsü aser agizüktetsü asoshi lir" ta pai ashi.

Tanü sentong ajanga asenoki folk art aser culture wazüka ayuba aser ajungketba sayur. Iba ajanga linük nung Zonal Cultural Centres balala nungi artist tem adenshir aser pei pei sobaliba ajanga benjung meraktdaksür, ta Ganesan-isa ashi.

Paisa iba sentong nung

yariteper ajak dang pelaba metetdaksü. Parnoki sobaliba wazüka ayutsü atema bendanga agüja inyakba ajanga tatishitsü tajung sayur ta paisa ashi.

Ibala sentongtem ajanga nukjidong tongtetogö aser Ministry of Culture, Government of India kübok NEZCC nem tenüngsang agütsür ta Ganesan-isa metetdaksü.

Bharat Janno Programme ajanga North East region nung sobaliba tesentaktep akangshiba dang masü saka India kübok tanga tesemtem den sendakteptsü, ta Governor Ganesan-isa ashi.

ULB election atema Dimapur Ward 12 nungi NDPP candidate sangdongogö

Dimapur, Aami/June 15 (TYO): Dimapur Municipal kübok Ward 12 nungi tang aruya aliba ULB election nung tokteptsü atema Nationalist Democratic Progressive Party (NDPP) candidate, Yimkumba declaration sentong ka June 15 nü Lingrijan Council hall nung agiogo.

Sentong nung o jembiba mapang Yimkumba-i mezüing Advisor Moatoshi Longkumer-i pa nongita yariba atema kanga pelaba lemsateba den ward balala nungi NDPP candidate temi takok tajung nguteta longjemer Dimapur tajungba küma yanglushitsü imla ataba lemsatepa liasü.

Paisa, lenmang, kilentsü, street light amala koba jenjang mejungi ali item ya jenjang tajungba küma yanglushitsü aser talisa health care dak sendakba nung rangloker inyaktsü tebilemba aliba lemsatepa liasü.

Maneni Yimkumba-i, lanur ka ama lanur khuret angateta lanurtem aser lokti nung tetsürtem jenjang ajungkettsü atema takokba tashi jenjang tapet agitsü temulungtetba aliba lemsatepaliasü.



Yimkumba

Iba sentong nung Advisor Moatoshi Longkumer-ia o tatsüka jembiba mapang, pai nüburtem dang ochishia election nung ajaki shilem tajung agitsü atema tayongzükba ka agüja liasü.

Kasa mapang nung Ward 12 kübok Lengrijan, Aokong colony, Hill View Colony aser Industrial Estate Colony nungi lenirtem den Ao Senso Telongjem Dimapur aser Lingrijan Council nungi lenirtemia tayongzükba o balala agi sentepa aliba lokti ayongzükba liasü.

Tanü sentong ya Sentimeren Pongen lenisüba nung agi aser DABA Pastor Rev. Alemwati Longkumer-i bendanga agüja sarasadem agia liasü.

June 21 nü Kohima nung World Music Day amongtsü



Kohima, June 15, 2024 (TYO): Nagaland Musicians' Guild-i June 21 nü 9 buba World Music Day amongtsü sentong renemer.

June 21 nikongdang 5:00 ako nungi The Heritage, Old DC Bungalow Kohima nung iba benjung amongtsü.

Symphony Café nung osangbener den jembidang Musicians Guild president Melekhoto Pucho-i iba osang lemsatepa liasü.

Iba benjung ya Symphony Academy of Music-i Audio Garage, Life Pro Productions, Shiu Lights, San Production aser Tozo Powerline nung den yaritepa ayongzüksü ta pai ashi.

WMD benjung atema tayaritepertemji- The Heritage, Alder Retreat, 2K Hotel, My Retreat, DE Oriental Grand, LA colline, Imprint, Disong Design, Alder college, Kros College, RSL, Synergy Group Enterprise, Geisou Sound, AK tools Hub, Kohima canopy, City Gym, Mon School of Music, CZ Powerline, Whito School, 3E Nagaland, AK Events, Backspace Enterprise, Elpis Academy of Music, Music Academy Tseminyu aser Mount Hermon Higher Secondary School nung lir ta Pucho-i metetdaksü.

Benjung nung alakteta jaokerji Assam nungi guest band

Rain in Sahara lir aser Version 2, Akhrieze, Atiro Kiho, Kivito, Senti Yabang, Zayie Zacchaeus, The Glutton o Papersky nungeria shilem agitsü ta paisa ashi.

9 buba World Music Day entry ticket ka nung Rs 200 asütsü ta Pucho-isa shisem.

WMD benjung mamongdang one versus one Open Style Battle ka agitsü. Iba sentong ya nikongdang 3:30 ako nungi Lamgrace Dance Studio nung agitsü ta paisa metetdaksü.

Iba ya WMD Dance Battle volume 2.0 asütsü anungji tsüngsangertemi arua shilem agitsü aser senpet agizüksü ayongzükür ta Pucho-isa ashi.



Dimapur ULB election atema renemshiba mapang Dimapur District Administration-i achayanga presiding Officer, polling officer, polling officer 1 aser 2 aser grade IV staff tem densema polling personnel tem training mezüngbuba shilem June 15 nü Dimapur Government College nung agiogo.

Nüburtemi yaria adokdaksüra... (Tapak 1 nungi...)

Mokokchung nung Alongmen Ward-ji town tiyongtsü aser shishilembaba timba ka Alongmen Ward nung amenoka lir, aji asünung wadang teinyaktsü jenti dang lir, saka item mapatongtemji nüburi dang pa dak temelung lemteta pa adokdaksüra Alongmen ward-sanger asoshi inyaktsü bilemdagita NDPP candidate Imlikumzük-isa ashi.

Imlikumzük-isa teinyaktsü mapatem nangzükba mayur saka mapangtong nung maparen teinyaktsü alibattemji Alongmen Ward yimden den angatettepa aser Alongmen Ward nübur den shisatsü lemsateperang ochishia inyaktsü tebilemba lirta ashi. Paisa Alongmen Ward-ji Mokokchung town noksa lir, tangari Alongmen Ward ajanga dang Mokokchung noksa bener aotsü anungji mapatong ajak dak alia Sanitation nung mezüngbuba rangloker inyaktsü nukjidong lirta shisem.

Nagaland nung tang NDPP yimsüsüba lir aser ano ULB election nunga NDPP party-i takok ngutettsüta amanger, aji asünung Alongmen nüburtema ruling NDPP nung dena ULB election nunga takok ngur ruling party temoatsü agitetsü asoshi kanga dang shisa kaa iba ULB election nung shilem agidaktsünerta NDPP candidate Wb. Imlikumzük-isa sentong nung adenshia aliba Alongmen Ward nüburtem ayongzükba ashi.

Kasa sentong nung NDPP Mokokchung Region President Wb. Mayangnungba ajanga NDPP Party tenüing




Wb. Imlikumzük Kichu

nung tayongzükba o jembiba den ano 25th Mongoya AC President Wb. Yimya-i 25th Mongoya AC ajanga Wb. Imlikumzük Kichu dak kanga dang temelung lemteta NDPP Party ticket asoshi kuli sütsü aser atangji ticket nguteta noktaker asünung 25th Mongoya AC office ajanga takokba tashi yariteptsüta metetdaksü, maneni NDPP Alongmen Ward Unit Treasurer Wb. Yashizünga ajanga Wb. Imlikumzük Kichu den Alongmen Ward Unit nung külemi inyakba kuli tajung lemsateper aser Alongmen Ward Yimden, Mokokchung Town senso Telongjem aser Rionsanger Putu Menden Mokokchung village nungia züngsem kakati tayongzükba o jembiba liasü.

Iba sentong Evangelist Wb. Imnachuba-i Tsüngremer lenisüba jazüka sarasademer tenzük aser tatem nung telok külemi sarasadema tembangba den iba sentong NDPP Youth Wing Alongmen Ward Unit Secretary Wb. Merensünep ketdangsuba nung agi.

G7 senden nung PM Modi-i US Tir Biden densema lenir aika ajuru



June 15, 2024 nü Apulia, Italy nung G7 senden alidang Ato kilonser Narendra Modi aser US Tir, Joe Biden na ajurutepdang tangokba noksa nung angur.

New Delhi, June 15 (Agencies): June 13-14, 2024 anogotem nung Italy nung G7 senden aliba mapang Ato kilonser Narendra Modi-i US Tir, Joe Biden densema lenirtem aika ajuruogo.

G7 ya United States, United Kingdom, Italy, Japan, Germany, France aser Canada linüktem tentet ka lir, aser iba senden nung Outreach linük ka ama India-a jaokba ama linük tenung nung Ato kilonser Narendra Modi oa aden.

Modi-i tang agi pongubenbuba G7 senden nung denogo aser tawa pai kümsük tasembuba Ato kilonser tenangzükba agiba sülenbo tang mezüing Italy semdanga iba senden nung aden.

G7 Summit Outreach Sessions nung adentsü atema Italy-i Modi jaoka liasü.

Iba senden nung Modi-i outreach sessions aika nung shilem agiogo. Pai Italy Ato kilonser Georgia Meloni, Japan Ato kilonser Fumio Kishida, France Tir Emmanuel Macron aser Ukraine Tir, Volodymyr Zelenskyy nung den-a jurila senden amen.

Modi-isa US Tir, Joe Biden aser Canada Ato kilonser Justin Trudeau-a ajurua senden amen.

Hokolbarnü Italy kübok Apulia nung artificial intelligence (AI), energy, Africa & Mediterranean outreach senden nung Ato kilonser Modi-i shilem agia aden.

Ato kilonser Modi-i, Global South ajungtsü atema India-i inyaker aser alima yimtenren tsütsü Africa ya tongtumbang, ta

ashi. Paisa, alima sabang nung Global South nung aliba linüktem indang tebilemstü onüktem atema tongtumbang süa inyaksü asoshi India-i inyaker, ta ashi.

India-i Africa den ano tesendaktep tajungba yanglutsü, ta metetdakja Modi-i, India G20 Tir asüba mapang nung African Union-a G20 nung permanent züingsem akümba metetdaksü.

Hokolbarnü Italy kübok Borgo Egnazia nung G7 Summit outreach session tembangba sülen Modi-i Italy aser Japan na nungi Ato kilonser den jurila senden amen.

Hokolbarnep pai France Tir Emmanuel Macron, British Ato kilonser Rishi Sunak aser Ukraine Tir Volodymyr Zelenskyy nung den jurila senden mena liasü.

Hokolbarnüsa Modi-i Canada Ato kilonser, Justin Trudeau den mapang tatsüka jembia liasü. Yaküm Canada-i, Khalistani lenir, Hardeep Singh Nijjar tepsetba nung India nung agencies-i shilem agia lir, ta tai tongloksüba sülen India aser Canada na tsüingda tesendaktep raksaogo.

Ukraine Tir, Zelenskyy den senden amendang Modi-i ken o jembiba ajanga aser yimtenren ajanga Russia-Ukraine rara anentsü India-i ajungshir, ta ashi.

Modi-isa Zelenskyy dang, yimjung ajanga ken o ajak bentettsü atema India-i maneni akokba tashi yariteptsü, ta ashi.

Hokolbar aonung Ato kilonser Modi-i Italy nung United Nations Secretary General,

Antonio Guterres-a ajuru. Tesülen Modi-i X ajanga, "Italy nung United Nations Secretary General, Antonio Guterres ajuruba atema pelar," ta metetdaksü.

Modi-isa Turkey, UAE, Brazil aser Jordan linüktem nungi lenirtema ajurua jembia aser parnok den külemi noksa tangoka liasü.

Modi-i Turkey Tir Recep Tayyip Erdogan, UAE Tir Mohammed bin Zayed Al Nahyan aser Brazil Tir Luiz Inacio Lula da Silva nung ajurua tongmelang agi sensakema liasü.

G7 senden nungsa Modi-i Pope Francis-a ajuruogo.

Tesülen Modi-i X ajanga, Pope Francis-i nüburtem tenzüksü aser alima tajungba akümtsü atema atemzükter inyakba atema pai Pope nüksüshir, ta ashi.

Modi-isa Pope dang India semdangtsü mepishia liasü.

2021 küm nunga Modi-i Vatican semdangba mapang nunga pai Pope Francis dang India semdangtsü mepishia liasü.

Anogo asemnü Italy semdangba sülen Hokolbarnü Modi-i Delhi-i apusoa ao.

Modi-i X ajanga, "Apulia nung G7 Summit nung kanga tajangzük ngua mongogo. Alima nung lenirtem den shisa lemsatep aser onük balala nung o lemtepa liasü. Alima nung meimchirtem tebilemstü bentettsü aser tarutsü atema alima tajungba kümdaktsütsü asoshi onoki nükkidong ayur," ta metetdaksü.

NEET Exam ochimashi ken o dak sendakba nung sen cr. 9 cheque angu

New Delhi, June 15 (Agencies): NEET exam ochimashi ken o dak sendakba nung Gujarat nung nisung pongu apuba sülen ano mangatettep tasen ka adokogo; par pongu ket nungi sen crore 9 cheque ka den pendrive ka nguogo, ta osang ka ajanga metetdaksü.

NEET exam ochimashi ken o dak sendakba nung Godhra nung school tesayur, Tushar Bhatt indang gari nung sen lakh 7 angu aser coaching centre ka nung director, Parshuram Roy indang office nung sen crore 2.50 cheque angu; senji kaketshirtemi parnok nem agütsüba lir, ta osang angazüker.

Tamalen osang ka ajanga ashiba agi, kaketshir 16-i parnok indang answer paper tangar nem langzüdaktsütsü atema Parshuram Roy nem sen lakh 10 agüja liasü. Roy-i tatidang agütsürtem dangji nenoki meteta aliba telangzüba dang langzüang aser tanüngbaji melangzüi tokjang ta metetdakja liasü.

Tanüngba tasüdangbatemji tesülen Godhra nung aliba Jai Jalaram School nung tesayur, Tushar Bhatt-i langzüja liasü.

District Education Officer-i parnok anema Godhra Taluka Police Station nung ken o ka benokogo.



International Day of Yoga anogomong atongtsü mapang ana nung lia June 15, 2024 nü Varanasi kübok Namoo Ghat nung yoga aidang tangokba noksa nung angur.

Taruba hopta EAM S Jaishankar-i Sri Lanka semdangtsü

New Delhi, June 15 (Agencies): June 20 nü External Affairs Minister, S Jaishankar-i Sri Lanka semdangtsü sentong lir, ta Honibarnü Foreign Ministry osang ka ajanga metetdaksü.

Jaishankar-i Sri Lanka semdangtsü aser kobi melii Ato kilonser Narendra Modi-ia asetkong linük semdangtsü onoki imlar, ta Sri Lanka Foreign Minister, Ali Sabry-i metetdakja liasü.

Sabry-i, taoba hopta Sri Lanka Tir Ranil Wickremesinghe-i New Delhi semdanga Modi kümsük tasembuba Ato kilonser

tenangzükba agiba sentong nung aden, ta metetdaksü.

Ajisüaka tang tashi nungbo India Ministry of External Affairs-ibo Jaishankar-i Sri Lanka semdangtsü osang official süabo memetetdaksü.

Sorkar tasenba nung Jaishankar External Affairs Minister shimba sülenbo tang mezüing pai bendang linük semdangter asütsü.

Yaküm October ita nunga Jaishankar-i Colombo semdanga 23buba Council of Ministers' senden aser 25buba Committee of Senior Officials of the Indian Ocean Rim Association (IORA) senden nung dena liasü.

Maharashtra election nung onoki takok angutsü: Uddhav Thackeray

Mumbai, June 15 (Agencies): Honibarnü Shiv Sena (UBT) Tir, Uddhav Thackeray-i, Maharashtra Lok Sabha election nung Maha Vikas Aghadi (MVA) teloktepi takok anguba ya tang tetenzükter dang; taruba state assembly election nunga MVA teloktepi takok angutsü, ta ashi.

South Mumbai nung osangbenertem senden ka nung Thackeray den külemi MVA teloktepi nungi NCP (SP) Tir Sharad Pawar aser Congress lenir Prithviraj Chavan nungeri osangbenertem den jembia liasü.

Taküm Maharashtra nung assembly election agitsü lia party aseme jelia senden ka menogo. Thackeray-i, "Lok Sabha

election nung Maha Vikas Aghadi (MVA)-i takok anguba ya tatembang masü saka tang tetenzükter dang," ta ashi.

Congress lenir, Chavan-ia, Lok Sabha election osang sangdongba sülen Maharashtra nunga sorkar melentsü, ta metetdaksü.

Ato kilonser Modi aija Sharad Pawar-i, "MVA atema yimtenren tensa tajungba kümdaktsüba atema onoki Ato kilonser Narendra Modi dang pelar," ta ashi.

Tawa Lok Sabha elections nung Maharashtra nung Congress-i menden 13 nung takok angu, Shiv Sena (UBT)-i menden 9 aser NCP (SP)-i menden 8 nung takok ngua liasü.



NEET-UG exam results nung ochimashi anema June 15, 2024 nü Bihar yimtiba, Patna nung kaketshirtemi garitsüing rongka longkak aiddang tangokba noksa nung angur.



TIR YIMYIM YIMOBILEM (EDITORIAL)

DIMAPUR AMUNGNÜ, JUNE (AAMI) 16, 2024

Obalai aginüba sempet

Tanu ama tebutem anogomung amungdang kibong nung kinungtsü aser chirnurtemi tebu peladaktsütsü meranger, kechiyong ibai tebu temeim anogo bilemteta pelatepa amungtsüba anogo lir. Ibayongji, chirnurtemi obala asoshi pei akok sempet tajung renemtsür aser arogo nunga sentong tajung ayongzüka tebutem nem tenungsang agüja amunger. Atangji, kibong nung tetsüiang khuret tuluba bena kibong mesua alitsüa akok saka kibong nung tebu akhumji kidang kilem aser jara amai lir. Aiben kidang kibong nung aikati iba akhumji mereprangteti akümli suidaktsür aser asüpila sentep nung dang jeba obala nung sanga o tajung aika ashir. Ibjibo tsüraburi ashi medem tzürong nung ken tendoker amai lir. Atangji, tasür indang tajung jembibajia junger saka masüdang kati ka tenungsang sangtepa ali tajungba. Aji oda, koba kibong nung sudirsuaka obalai chirnurtem nungi aginübaji tula suoshi ka masü saka tashi angaba aginer. Kasaji, tebutem madak tebu, Kibuba Tsüngremia tebutem nungi rongsen tenla masü tashi angaba tenla aginer. Atangji, shitakba tashi angaba yabo temeim nungi arur. Asenoki memeimyonga tashi angatsüa akok saka ibajibo meimba agi masü saka ozüing tsübuba agi tashi angar asütsüa akok. Aji oda, kodang asenoki obala temeim angatetdir asenoki pai asenok dang meimbaji meyipa agütsünutsü. Iba temeim meyipa agütsübajibo sen agi malizüktetba jenjang ka lir, aji tashi angaba agidang küptoktetsü. Atangji, obala dang tashi angaba nungji pa ajangzüker masü asenokang ajangzüksüba lir ser nung, aiben asenoki obala dang tashi angaba jagi asenok akoksatsü amai bilemer. Itemji kodang bilemdangdir, ashiko, asenok aika atema tanu ama tebutem anogo amongba ya pei tebu dang tashi mangaba aser jashidaktsüba atema taidok meshia amungba anogo-ang ka asünung tajungba asütsüa akok. Alima nung nisung ajak asoshi taküm alidang dang masü saka sur külena angutsüba sempettem rongnung tulutibaji taidok anguba ya asütsü. Iba tangatetba nung tebutem anogo nung tebutemi tebu Tulusang Tsüngrem dang taidok meshitsü aser alima nung chirnurtemia pei tebu dang tashi mangai lira, iba atema taidok meshitsü ta tebutem anogo ya mungra, atangji, tebutem anogo ya pei kibong aser taküm asoshi tepelatiba anogo ka asütsü. Taidok meshiba aser taidok agütsüba jenjang yabo tula suoshi mesura sempet oset ka den medemdangtsü makok, ibai nisung ka nuchi akümdak aser tepela taküm tasen tenzükdak lir. Ibjabi kodang asenoki angateta tebutem anogo ya mongdir, asenok aika atema tebutem anogomung ya kibong nung aser lokti nung tebutem o chirnurtem na tsüngda tesendaktep yanglushiba tepelatiba anogomung asütsü. Kasaji tebutem asoshia tebutem anogo ya kotak obala dang taidok meshiba aser tenungsang agütsüba anogo ka kümdakja mungra, tebutem anogo ya pei taküm aser kibong asoshi 'revival' anogo kümadoktsü. Aiben asenoki tebutem aser tetsütem anogo ya tanurtemi mungtsütsüba anogo amai dang bilema asenoki parnok dang nungiang imlaseta amunger. Ajisuaka, tebutemi iba ama tebutem anogo nung ya nia tebu ka asütsü temsur metemsa (?) ta bilemdanga mungra, ashiko, iba anogo nungang shitakba tebu akümer amai pei tebu Tsüngrem temeim angateta pei kibong nung temeim sayu tenzüka anogo ka kümadoktsü ana nung lir. Iba tangatetba nung tebutem anogo ya asenoki meimba agi tashi angaba aser temeim angatetba agi taidok meshiba aser taidok agütsüba anogo ka kümdakja amongtsü ajungshir. Iba ama anogo nung taküm lia asüpila sentep sentong agir ama, kinungtsü aser tanurtemi tebu dak aketba temeim aser tajung indang jembitsü aser tebuia pei kinungtsü aser tanurtem dang parnoki pa meimba aser anepaluba asoshi pelaba ashitsü ta sensaksema mungra, alima nungi mepiladangyongi tebutem anogo nungi tenzüka kotak lima nung ali tenzüker asütsü. Asenokbo ojala dang aser obala dang parnoki meimba asoshi tepela o ashitsü parnok asü matali saka tanu ama parnok anogomung amungdang, asenoki parnok dang 'kanga pelar' ta shiadokdi.

OLEMSABANG

KÜBU KÜNA OTSÜ

- Temjentenzük Changkiri

"Achaa pota", ta Central Security Force, shirnoki Nagaland Civil Secretariat anüker, parnoki künep kü dang ashiba ni kodanga mamar. Iba ya anepdang 6:00 AM meta tatalokba ka lir.

Ni tila asüdang nungi kü mulung nung tejangraba ka liasü aser aji künübosa kü tsürabur kü gari nung mendaktsür anir senzütsübaji liasü. Iba tejangraba Tsüngremi atalokdaktsür joko küm aika süia arudar. Tangbo joko kü temeim obala alima nung mali kümer, küm terok buba (6 years), ano yashiang atalok ama süia odar! Pa maliba onoki kanga meteter aser taküm balaka, Tebu Anogo 16th June, ya kübu tasoba anogo ataba agi kanga menungra pa taküm alidang künati inyakba otsü ka lemsateper.

Kübu küna otsüji mamadoktetsüsa aika dang lir. Iba amaji asenok aikati pei tebu temeim otsüji jembika mejembima rizünga alitsü. Ni ozü tsürabur alima talang tonga anir senzütsüsaji tia jagi bener marutsü. Oda, asen atepzüng Nagaland atena khen danga anir motet!

Mapang ka nung kübu ozü kidang mungdaktsütsü atema yimtak nungi anir arua liasü. Künep küna yakta saker, Kohima yimtiba nung meta kar ajia senzüa liasü. Iba mapang ni pa dang Phizo, shiba nem asen linük tebu ta naroküm agüja lir, pa leper koba Nagaland Civil Secretariat anasa lir aji sayua liasü. Phizo leper lung nungji kongshia pai angashiba Phizo indang otsütem yimdangi arua kü dang shia liasü. Pa iba leper nung noktaker noksa aika noktakyim balala nung agitsü.

Ni pa dang Nagaland Civil Secretariat koba nung Chief Minister Office amenloker yimsü asür ajia sayunüa liasü. Saka telungi aitsübaji tamakoktsü mapa ka liasü, kechiyong ibaji anepdang ano shinga office-i maruba mapang ka liasü. Gate anasaji noktaker ni kübu dang Secretariat telungji temeyong agi tuyua sayubaji ngur, idakji security officer kati kü dang "achaa pota", ta shia liasü. Koba tetezü "semchir tajung" ta ni angatet. Ni kü mulung nung ni ya parnoki kübuer semchir ama bilemer südi ta bilema liasü! Ni tera terata nung parnok dang "good morning" ta dang shir, menerema sayur, ilonga meyipdi ta alidang, security officer jagi Nagaland Civil Secretariat gate-ji kübu küna atema lapoktsü! Kanga süngmangseta, pelaseta, kübu küna telungi ai aser moapu nungji ni pa noksa aika agitsü. Küna Secretariat moapu nungji otsü atonga jajadang, ni pa dang iba ya Nagaland temulungjang ama lir. Idaki inyakertem ya mashi kabo meinyaker. Idaki Chief Minister-i anir tulurtem ajak office lir ta kübu dang shia liasü.

Anogo aika ozü kidang mungzüker külen, ni kübu anir Dimapur nung adianu kinungertem den ajurutepa kitem senzüdang, pai küna Kohima nung senzüba otsüji metangtangi tajurur ajak den lemsatepa liasü. Küna kitem senzüba mapang nungji adianu kar dangbo pai yamaisa asüngdanga liasü- "Nenokia Phizo leper ngudanger asü?" "Naia Phizo leper ngudanger asü?" ta kübui küna senzüba otsütem pelaseta lemsatepa, pa menerem jakden, pa ola tanük kanga jangjaa tanü tashi menungra bilemteter. Pai ajurur tsüraburtem shirnok Dimapur nung arishi talangka alirtem lir, parnoki ano Phizo leperji mangu ta ashidang, pa koma tejak tenteta liasü item ajak bilemteta tepela agi kü mulung asünger. Nibo kübu atema tilatiba ka dang inyaktet. Pa temeim denbo kheni medemdangtsü makok! Saka iba mapang pa kanga pelaba jagi tanü tashi kü mulung anisüngzüku tulu angua Tsüngrem tenüing sanga alir. Kübu künati yangluba temenungratsü otsü aika rongnung iba ya ka lir. Tazüngerem kar dangatemoatsü angutsü teyimla nung züluogo. Tsüngremi tazüngerem aser tebutem ajak moajangma.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngerer angateta agitsü mepishir

Khristantem temeden atema inyaker Y Quynh Bdap apu



Y Quynh Bdap

Vietnam nung Montagnards Khristantem reshikangshiba atema iba linük ya Countries of Particular Concern (CPC) linüktem rongnung züngoktsü benoka arur.

2019 küm taoba mapang North Carolina nungi US Representative, Ted Budd densema U.S. House of Representatives nungi züngsem kari Vietnam War mapang nung Vietnam nunger Montagnard Khristantemi tasü itta raraba atema tetushi agütsütsü benoka liasü.

USCIRF sangdong ka ajanga ashiba agi, "2014 küm October ita nungi tenzüka Montagnards Khristan 300 shii Vietnam nungi jena oa Cambodia nung jenokogo aser ibaji yimsü nung ajemdaker reshikangshi ajanga liasü. Ajisüaka parnok 13 nem dang United Nations High Commissioner for Refugees (UNHCR) den refujee jenjang agütsü."

Thailand nung U.N. refugee ka ama Bdap nem Thailand sorkari pa nem tekümzükba agütsütsü melen Thailand police-i ang pa apu.

Human Rights Watch densema meimchir temeden atema inyaker telok aikati Thailand ketdangsertem dang Bdap tangsa chiokang ta takhangba agütsür.

"Pa Vietnam ket nung agütsüra Thailand aser International ozüng kübok Thailand-i aibelener asütsü," ta Human Rights Watch deputy Asia director, Bryony Lau-i metetdaksü.

June 15, 2024: Thailand nung police-i Vietnam nunger aser Khristantem temeden atema inyaker, Y Quynh Bdap puogo, ta International Christian Concern (ICC)-i metetdaksü.

Mongolbarnü pai Canadian Embassy nung ketdangsertem den senden mena pa jenokdaksütsü atema mepishia liasü.

Taküm January ita nung Vietnam nung court kati Montagnards Stand for Justice group-i sorkar anema rara ayonga Vietnam kübok Dak Lak nung rara adok, ta metetdaksü liasü. Ajisüaka rara adokba mapang nungji Bdap bo Thailand nung liasü.

Arrshi küm 32, Bdap-i, "Ni ya meimchir temeden atema rarar ka aser ni yimsü

temeden aser nüburttem atema nokdaker. Ni yimjung nung dang mapa inyaker aser Vietnam nung meimchir temeden anema inyakba osangtem ang bendener aser item ama osang zülur," ta ashi.

2018 küm Bdap Thailand-i jena ao aser pai yangji United Nations refugee jenjang ngua liasü. Pa ya Vietnam nung lisopur minority 'Montagnards' kin nung lir. Montagnards nunger nütsüng teimbaka Khristantem lir aser parnok Vietnam central highlands aser Cambodia nung alir.

Tesüiba küm jenti aikati Montagnard Khristantem reshikangshia aruogo. Küm 22 tashi United States Commission on International Religious Freedom (USCIRF)-ia U.S. State Department dang

Pakistan nung Khristan densema minorities nem sen melemzüksü

June 14, 2024: Pakistan nung sorkari Khristantem densema minorities nem budget nungi senotsü kecha melemzüksüba atema lenirtemi sorkar aitsü.

June 12, 2024 nü Federal Finance Minister, Muhammad Aurangzeb-i 2024-25 kümsük atema sen 18.87 trillion budget benoka liasü.

Budget nungji Ministry of Religious Affairs & Interfaith Harmony nem sen million 1,861 lemezükja lir. Muslim nunger temeshi aini oa Mecca nung temeshi tesem balala semdangtsü atema-a senotsü lemezüksüogo.

Yaküma kasa ministry nem sen million 1,780 lemezükja liasü.

Yaküm minorities atema sen million 100 lemezükja liasü saka takümbo minorities nem sen melemzüksüba atema minorities lenirtemi sorkar aitsür.

Minorities welfare atema sen melemzüksüba indang kuli sorkari memetdaksü. Minorities nem lemezüksüba senotsüji talisa kaketshirtem scholarships aser minorities benjung nung amshia aruogo, saka takümbo senotsü melemzüksü.

Punjab provincial sorkar nung taoba mapang human rights & minority affairs minister aser Khristan, Ejaz Alam Augustine-i, budget nung minorities nem sen melemzüksüba ya talisa kaketshirtem aser minorities atema osang tamajung ka lir, ta ashi.

Osangbener den jembidang Augustine-i, "Tamalena senotsü ishika dang lemezüksü saka tangbo senotsü meshimeshia melemzüksü. Asen kaketshirtem kanga timtemtsü, kechiyong parnoki sorkar teyari nungdaker," ta metetdaksü. 2008 küm November ita

nung Pakistan nung mezüng Federal Ministry for Minorities tenzüka liasü. Iba ministry nung minister ji Khristan, Shahbaz Bhatti shima liasü saka 2011 küm March ita nung khaset. Kasa küm nungjisa ministry of minorities agi 'Ministry for National Harmony and Minorities Affairs' ta melena liasü.

2013 küm Pakistan Muslim League-i sorkar akümba sülen parnoki Ministry for National Harmony and Minorities Affairs tuluba küma 'Ministry of Religious Affairs and Interfaith Harmony' ta melena liasü.

Pakistan nung nütsüng million 241 lir aser linük nung minorities-- Khristantem, Hindus aser Sikhs sentepa nütsüngji shilem 5 dang nungi ishiba. Iba linük nung nütsüng shilem 96 bo Muslim nungertem lir.

ANOGO ABEN TSÜNGREM DEN

TECHIR DAK AMANGBA TAKÜM

"Shibai Techir dak amanger, pa teti taküm kar, saka shibai Techir dak mamanger pai taküm mangutsa saka Tsingrem terasaba pa madak lir." Yohan 3:36

Alima nung tamangba yimsü meyerijang aika lir, pan ajaki tekümtet angutsü asoshi tesayuba bulala age Tekümtetji kechi ta süra, asen alishi ya kenü smat tanabuba lima nung taküm tasen angutsü indang jemi aser nisungtemi iba asoshi item yimsütemji benshir.

Saka tanü asenok khristan ta asüba ya yimsü benshi telok ka masü saka Tsüngrem ajaso Chir Yisu Khrista shib ajanga tekümtet agütsür tanela kümzükba pa dak tamang agi amangteta amangba tamanger telok ka lir. Kechryone Tsüngrem O jagi jangja jangja shiogo, "Shibai Techir dak amanger, pa teti taküm kar...."

Temeibatem, naia kechi koma bilemer. Tanü asenok khristan tamangertemji reprangdangra tamanger masi saka yimsü yimpong benshir ka ama kümogo. Iba jay tatem mademtsü. Kechiyong nisung aikati pei tai tenenen mapatem mapa tajung kar inyakba agi nempang meranger aser temeden angutsü bushir.

Tsüngrem oi tamanger shirnoki angteter mamanger parnik dang yamai ashir, Tsüngrem terasaba parnok madak alitse Asenoki pei taküm khen meyipa reprangshiti, kechiyong mamangtetba nung asen shi aser tanela samatsü ana nung lir.

MAMATETBA OBALA

Onok dang teti meima aliba Oba, na iba lima nungi pilar joko küm 7 renteter, saka ozü molongjang nungi ne temeim, ne sarasadem aser nai onok anebaluba kodanga mamar aser maidokteter. Oba künü onok ajak na alidak jagi sendentsü anungji ibai na kija dak ataloker ama nemjema tepilem saka Teyanglur Yihova Tsüngremi alipokdang nungi meimchir atema routine yangluadokogo. Tsüngremi na arishi talang küm 90 tashi temjena moatsür anir ogo iba asoshi onok molung anisüngzükba. Oba, na alima nung alidang nai mepelatsü aser temolung machiba kar lira onok dang tai tokangma aser nai toktsür aoba temeim Ojalai anir japaso-jala, semchirtem atema teti sarasademjang ta mepishir. Tanü iba Obalatem anogo tulu nung kübu meliaka anünga aliba akümlir Obalatem ajak nem akhüm-tetushi agütsür. Tsungremi Obalatem moajang.

- M.A. Ao, 4th mile

TANÜ OBALA NEM AKÜM TETUSHI AGÜTSÜBA ANOGO TAJUNG

O! Oba, tanü ya alima ajunga nung obalatem nem aküm tetushi agütsüba anogo bilemteta amungdang tashi na arishi moaja toktsüba ya koda tesüngmangtsüka

Alima nung hon taripitem sentsü perangshia aküm keta liakasa iba dang nungi nü aküm tuluba ta onoki teti nü tenüng asanger, aser aser teyanglur tenüng asanger

Oba, alima nung tensa mopung melentepa, yipru tesashi aruaka idangji na onok den lira onoki amang sangwa ajak nung kecha metsübui liteter

O oba, tanü ama alima ajunga nung nenok tebutem bilemteta tushia onoki amungdang, oda ni makamait taküm kati nü nem alima rongsen agütsütsü kecha meliaka, oda onoki sarasadema naro tejung kati danga tanü obala anogo bilemteter.

Anungji na tali kümkümschia temulung ulushir ner chirnurtem aser kibong teti kümzüka yuangni, aser nü takümji tzüyim tulu nung rongnir tajung ka ama alitsü tanü onok sarasadem. Tatem nung obalatem arishi talang moajang. Amen

- S Repa Pongner

AO OSHI ANGAZÜKDAK: TANÜ ANGAZÜKTSÜBA OJANG



Süzüng

(n) tezü nung atangba süngjang tapu ka (sword bean)

* Alemlibo süzüng agi sapon ama amshia tokolak alok.

Süzüngret

(n) temokok nung süzüng mesüka aliba teret, temokok ret

*Ni temokok atsükdang süzüngret ana küma jaksa.

OLONG PAITEP # 6819

1		2		3		4	5			
				6						7
		8								
9				10		11				
			12						13	
						14				
16							17			

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S_ _ _ i - (3)
- 9. Nisung rongnung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangliba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Kenyongi majinü - (5)
- 13. Rong kanga tulu - (5)

OLONG PAITEP # 6818 TELANGZÜBA

TIPIEN :

- 1. Kasa, 5. Atamata, 6. Atang,
- 8. Apang, 11. Benjong, 12. Kinük,
- 14. Asüng, 16. Nüngjem, 17. Liok.

LANGTSÜNGLEN :

- 2. Amet, 3. Tara, 4. Sangpang,
- 6. Asetkong, 7. Aiben, 9. Angsü,
- 10. Aji, 13. Kija, 15. Nare

NAI-A YA METETTER MA

INDIA NUNGER CRICKET ASAYAR RONGNUNGI MEZÜNGBUBA 50 & 100 AZÜKERTEM & ASER WICKET AGIRTEM



Amar Singh
1st 50 in Test



Lala Amarnath
1st 100 in Test



Polly Umrigar
1st 200 in Test



Mohammad Nissar
1st Wicket Test



Ajit Wadekar
1st 50 in ODI



Kapil Dev
1st 100 in ODI



Sachin Tendulkar
1st 200 in ODI



Eknath Solkar
1st Wicket ODI



Robin Uthappa
1st 50 in T20



Suresh Raina
1st 100 in T20



Zaheer Khan
1st Wicket T20



Manipur: Jiribam nung ki nungi ki meita aoba sentong ayongzük agi



Manipur nung Jiribam district kübok Jakuradhor yimtsüng nung bomb ka pokdaksüba sülen tensa azüoktsü atema ki meita aoba noksa angur.

Jiribam, Aami/June 15 (Agencies): Manipur nung Jiribam district kübok Jakuradhor yimtsüng nung bomb ka pokdaksüba sülen tensa azüoktsü atema ki nungi ki meita aoba sentong aser area domination ayongzük agiogo, ta Manipur police control room-i Honibarnü metetdaksü. Iba bomb ya June 13 nü anepdang 1 ako shi nung Jakuradhore Part 1 village kübok Narayanpur tesem nung Meetei nunger ka ki dak rangloker pokdakja liasü. Tang kin o kin tsüngda

mangatettep adoker tensa mejungi aliba mapang ka nung Manipur police aser central security forces na longjemer iba meita aoba sentong ayongzük agia liasü. Iba team yagi Borobekra Police Station kübok Jakuradhor Part-II village nung ki 30-40 tsüngda meita ao aser nisung 140 shi maitsü jangjashia liasü. Meita aoba sentong benoka inyakba mapang lendong kecha matalok, ta kasa sangdong ajanga metetdaksü. June 6 nü nungi tenzükä Jiribam district nung kin o kin

tsüngda mangatettep adoker aliba ajanga nisung 1000 shi jenshia ogo, kechiyong parnok kitem mi senokja rongtoktsüogo. Iba tebilemstü bentettsü atema lendong ataloktsü ana nung aliba tesemtem nung security tali akangshitsüogo, kong nüburtem sadem sadema senzüdaksütsü atema lendong keta aliba lenmangtemi security convoy tem yokba densema lir. Iba den bendenloksema Manipur kübok tenem aser lenden nung checkpoints talila 124 amenokogo.

Bangladesh nung Kuki-Chin nungertem reshikangshir: KCHRO

Aizawl, Aami/June 15 (Agencies): Kuki-Chin Human Rights Organisation (KCHRO)-i ashiba agi, Bangladesh nung Kuki-Chin nungertem reshikangshia amshir. KCHRO koba Mizoram yimtiba Aizawl nung amendaker lir, iba lokti tentet yagi Bangladesh nung Kuki-Chin nungertem jenjang kanga mejungi aliba indang British Red Cross nem metetdakja temepeshiba ka agütsüogo. Shiti ka ajanga iba lokti tentet yagi, Bangladesh army-i nüburtem pudenba indang metetdaksü, koba ajanga item kin nungi nüburtem tetsüba agi süngdaksüogo. "Ozü nüburtem aika tim mesüi puogo aser iba ajanga parnok kibongtem temetalokdak makai kümogo," ta shiti nung shia lir. Parnoki ashiba agi, iba tensa ya tejashitsüka aser agizüktsü makok.

KCHRO-isa, Bangladesh nung item kintem reshikangshia amshiba ajanga Kuki-Chin nungertem parnok talidak toktsür jena aotsüsa kümogo aser Mizoram nung jenoka lir, ta ashi. Maneni tangartem Bangladesh kübok tesem balala nung jenshia lir. Parnok ya arem nung jenoka lir aser parnok taküm samatsü tsübusüta litepdar, ta KCHRO-i ashi. Iba lokti tentet yagi ashiba agi, Bawm yimtsüng 137 shi amokmerendar aser parnok kümzükä toktsütsü atema tangsa tang jenjang agitsü nüngdaka lir. Kuki-Chin Human Rights Organisation-i, British Red Cross-i iba ken o nung teka amoka inyaksü ayongzükogo. KCHRO-i temepeshiba agütsüba rongnung, parnoki British Red Cross dang pei talidak toktsür jenshia or aliba Kuki-Chin nungertem nem

chiyongtsü, tejenokdak aser mozü amala tenokdangbatem agütsütsü, tang amokmerena aliba Bawm yimtsüng nem tekümzükba agütsütsü asoshi ken o dak sendaka aliba ketdangsurtem den inyakteptsü aser Bangladesh army-i kuli tejangja makai nisungtem apuba aser meimchir temeden anema inyaksangshiba aija ozüng alema pur alitem, talisa tetsür aser tanurtem chiokdaksütsü atema akhangtsüba densema lir. Temetettsü kaji, mashisa aliba tetsürtem aser tanur densema Bawm nunger 100 dak tema Bangladesh kübok Chittagong Hill Tracts nung April 7 nü nungi tenzükä military operation ayongzükä agiba mapang puogo. April 02 aser 03 nü bank ana auyaba aser Kuki-Chin National Front (KNF) puri bank manager ka pur aoba sülen army-i iba jenjang ya agia liasü.

Sikkim sorkari IAF dang teyari meshi

Gangtok, Aami/June 15 (Agencies): Sikkim sorkari North Sikkim nung anentsüh lendong atalokba ajanga taolen makai sabanger aliba alima penzür 1400 shi tayimtsü ajanga anintsü asoshi Indian Air Force (IAF) dang teyari meshiogo. Tzünglu kanga sashia aruba ajanga Sikkim nung timtem lendong tulu adokdaksüogo, kong lenmang aser aputem apongtocka ajanga alima

penzürtem tesem balala nung taolen makai küm daksüba densema lir. Iba dak sendakba nung Sikkim sorkari IAF den tongtepratepogo, aser parnok dang taolen makai sabanger aliba alima penzürtem anintsü aser tekümzükba maparen balala inyaksü atema helicopter aser tanga tenüngdakba resource tem agütsütsü mepeshia asüngdangogo.

Sikkim nung tzümtsüng aser anentsüh agi kongshir alirtem kümzükä toktsütsü aser parnok tenüngdakba peritsütsü asoshi sorkari jenjang agidar. Kasa mapang nung infrastructure balala raksar aliba yanglushia tongtibang lenmangtem lapokshitsü aser state nung transportation aser communication nung iba dak tali tetsüdaksü madoktsütsü atema sorkari rangloker inyakdar.

US-i Israel nunger telok ka nem tenokdangba agütsü



USA Tir Joe Biden indang administration-i Hokolbarnü Tzav 9 nem tenokdangba agütsüogo.

Washington, Aami/June 15 (Agencies):

Gaza-i humanitarian teyari bener yokba convoy tem nokdanga raksatsüba atema United States-i Israel nunger telok ka nem tenokdangba agütsüogo.

Tir Joe Biden indang administration-i Hokolbarnü Tzav 9 nem tenokdangba agütsüogo. Iba telok nukjijongji Gaza-i teyari kecha bener meyoki nokdanga ayutsü atema lir. Aid truck tem sota rakzükrakdemba aser mi senoktsüba atema iba telok ya aitsüogo.

"Gaza nung humanitarian crisis tamajungba küma meyoktsü aser ayawara agi meneptsü aliba nokdangtsü atema humanitarian teyari agütsütsü kanga nungdaka lir," ta Department of State-i ashi.

"Israel aser West Bank ajanga Gaza-i aoba humanitarian convoy tem nem security aser teküzmükba agütsütsü Israel sorkar khuret lir. Tenungdakba humanitarian teyaritem nokdangtsü atema jenjang agiba onoki khenyongi magizütsü," ta kasa sangdong ajanga metetdaksü.

Israel Police Commissioner Kobi Shabtai-i, far-right National Security Minister Itamar Ben-Gvir-i, Gaza-i aoba aid convoy tem nem teküzmükba agütsütsü atema law enforcement nokdangtsü asoshi jenjang agir, ta ashiba Israeli media outlets balala ajanga metetdaksüba sülen

anogo ka lir US-i tenokdangba agütsüba sangdongogo.

Ita aika Israel nunger right-wing temi Gaza-i teyari meyoktsü atema longkak aitba den lenmangtem nokdanga arudar. Iba jenjang agiba ajanga teyari kanga nungdaka aliba tesemtemi teyari yoktsü asoshi tetsükdaksü adoker.

Hopta tsüingda longkak aiteritemi jenjang talila agia convoy tem tali maka arudar aser talisa occupied West Bank ajanga aoba mapang item convoy tem amaker.

Taoba ita parnok Hebron Hills tesem nung teyari agütsüba truck ana rontokja liasü, koba US State Department-i Tzav 9 dak tai tonglokttsüogo.

Iba tenokdangba agütsüba ajanga iba telok indang US nung rongsentem mamshitetsü aser America nungertem parnok den tsütateptsü makoktsü. Biden-i agütsüba executive order (EO) dak ajemdaker item tenokdangbatem agütsüogo.

Taoba hopta Biden administration-i kasa EO ya benoka Palestine nunger telungpur telok Lion's Den nem tenokdangba agütsüogo.

Ajisüaka Washington-i, Ben-Gvir aser ultranationalist Finance Minister Bezalel Smotrich na densema West Bank nung Palestine nunger anema jenjang agiba Israel nunger ketdangsurtem nem tenokdangba agütsütsü ahangba magizüki arudar.

Iba ita US Senator Chris Van

Hollen-i, Biden administration dang Smotrich nem tenokdangba agütsütsü atema executive order amshitsü mepeshia asüingdangogo.

"Iba EO kübok Smotrich nema tenokdangba agütsütsü ta nibobilemer," ta VanHollen-i ashi.

Finance minister yagi Palestine nunger ketdangsurtem nem agütsütsü aliba saru magütsü ayu aser March ita West Bank nung ali hectare 800 (1,977 acres) Israel meyong ta sangdonga liasü.

"Iba nisungba nukjijong ya West Bank ajanga Israel-i atsüingtsü asoshi lir," ta Van Hollen-i Center for American Progress dang ashi.

Democracy for the Arab World Now (DAWN), shirnoki Tzav 9 nem tenokdangba agütsütsü ayongzükogo, parnok Hokolbarnü telemteba agiba ya pelashishia agizükogo aser Biden dang iba telok nem senotsü teyari agütsüba kija aser loktitem nema tenokdangba agütsütsü ayongzükba liasü.

"Israel nunger Minister Itamar Ben-Gvir-i, humanitarian aid convoy tem nokdangtsü atema Tzav 9 nem temelaba agütsütsü asoshi Police nem tetuyuba agütsüba jangjaogo aser iba ajanga nüburtem yaseta sädaksütsü atema lanur activist tem nungi tenzüker Israel sorkar kübok temaba jenjang nung aliba ketdangsurtem tsüingda sendaktepba inyakba sayur," ta DAWN nung director of research for Israel-Palestine Michael Schaeffer Omer-Man-i ashi.

"US-i, iba ozüing alema inyaksangshiba maparen nung Israel sorkar densema aliba sentoka metoktsütsü aser Ben-Gvir nema tenokdangba agütsütsü," ta paisa shisem.

Rights advocate temisa, Gaza sabanger aliba lapoktsütsü atema Israel nongshitsü asoshi Washington ayongzükogo.

US Secretary of State Antony Blinken-i iba hopta ashiba agi, Gaza nem teyari agütsütsü atema tetsükdaksü adoker alibatem agintsü atema ita ishika tsüingda Israel-i jenjang tapet agiogo.

Putin-i Ukraine nung rara anentsü atema takhangba kar agütsü

Kyiv, Aami/June 15 (Agencies): Russia tir Vladimir Putin-i, Moscow-i parnok meyong ta khangba aliba tesem pongu, koba Kyiv-i azioka ali, iba ya salatsü nungdang aser North Atlantic Treaty Organisation (NATO) nung adentsü benoker aliba agin nungdang Russia-i Ukraine nung rara anentsü, ta ashiba CNN sangdong ka ajanga metetdaksü.

Puti takhangba ya Ukraine-i magizük aser iba takhangba ya taksüka ta ashi.

2022 küm February ita Moscow aser Kyiv na rara tenzüka sülen, Putin-i tang mezüingbuba Ukraine nung rara anentsü atema Russia takhangba jangja jangja metetdaksüogo.

Switzerland nung Swiss peace conference amentsü lia Russia tir-i iba takhangba ya metetdaksüogo. Iba senden nung adentsü atema Russia bo mejaok.

Russian-Ukraine ken o dak sendakba nung Putin-isa, Kyiv-i demilitarize asütsüla aser anüolen aliba linüktemi Russia nem tenokdangba agütsü aliba agintsüla ta takhangba agütsü.

Iba den bendeloksema Ukraine nunger sepaitem Russia-i parnok meyong ta akhangba tesem pezü nungi atsüingtsüla, ta Putin-i ashi.

Putin takhangba ajanga Russia nukjijong metongtetba jangja jangja sayur. Mezüingbo parnok Kyiv anogo ishika

tsüingda aser Ukraine ya hopta ishika tsüingda atsüingtettsü ta bilema liasü. Ajisiaka anogo 28 sülen Russia-i Ukraine litsü pongusü nung ka dang atstüingtet, kong parnoki küm 10 tejakdang atsünger aliba Crimean peninsula densema lir.

Putin-i ashiba agi, Ukraine-i Kyiv nung item tesemtem nungi atsüingtsü renema aliba sangdongba sülenang onoki cease fire benoka sensaksem tenzütsü.

Russia tir-i ashiba agi, "parnok Kyiv nung iba amala telemteba agitsü renema aliba sangdonga item tesemtem nungi sepaitem aninba aser NATO nung adentsü tebilemba aliba nungi atsüingba officially sangdongba sülen onoki iba mapang nungsa cease fire benoktsü aser sensaksem tenzütsü."

Putin takhangba dak sendakba nung Ukraine tir Volodymyr Zelensky-i ashiba agi, Ukraine-i Putin takhangba dak tamang makar.

Italy nung Group of Seven (G7) Summit amenba mapang Zelenskyy-i, Putin tasa ya Nazi lenir Adolf Hitler-i, Europe nung 1930s aser 1940s tsüingda linük balala atsüingtsü atema amshiba tasa den kasa ta ashi.

Ukraine tir adviser Mykhailo Podolyak-i ashiba agi, chichiba yimjung asoshi onük kecha benoka mali aser rara tembangdaksütsü atema tejangraba kecha mali.

China-i SCS nungpar litsü adena aitba bendangertem aputsü

Manila, Aami/June 15

(Agencies): Chinese coast guard temzüing ozüing tasenba Honbiba nungi benoka inyaksangshi tenzükingo. Iba temzüing ozüing kübok coast guard-i, South China Sea nung mangatettep adoker aliba tesem adena aitba bendangertem pua yutetsü. Iba tesem nung Beijing-i jenjang talila agiba atema kidanger linüktem aser G7-i aitsüogo.

Beijing-i, South China Sea ajanga ya parnok meyong ta shia arudar, aser Philippines densema kidanger linüktemi tesem balala parnok meyong ta ashiba magizükba den international temzüing ozüing sülena anidaksü memulunger.

Iba tzyüim meita atatsü atema China-i coast guard aser tanga rongtem yokogo aser reefs aika militarised artificial asetkongtem kümdaksüogo. China aser Philippine nunger rongtem iba mangatettepa adoker aliba tzyüim nung aiben mangatettep adoka arudar.

Honibarnü nungi tenzüka China nung coast guard-i, arrtsü adena aitba bendagertem sota yutetsü, ta new regulations-i online nung sangdong ka ajanga metetdaksü.

Ken o tebenja kar nungbo coast guard-i apurtem ya anogo 60 tashi sota yutetsü, ta parnok

ashi.

"China meyong tzyüimi aitba bendanger rongtem sota ayutsü akok," ta kasa sangdong ajanga metetdaksü.

Philippines nunger rongtem amakba atema Manila-i China nung coast guard aitsüogo aser tir Ferdinand Marcos-i taoba ita, iba ozüing tasenba dak shisabulutsü keta lir, ta shiogo.

China nung Coast Guard rongtemi mangatettep adoker aliba tzyüim nung Philippines nunger rongtem dak aiben water cannon khaloktsüogo. Mapang kar nungbo rong tsüktepa aser Philippines nunger sepaitem yiruba dena atalokogo.

Philippines indang military tekolakba General Romeo Brawner-i Hokolbarnü osangbenertem dang ashiba agi, angopurtem kümzüka toktsütsü atema Manila nung ketdangsurtem sensaksemdar.

Brawner-isa, Philippines nung angopurtem dang tsüba malitsü, aser taoba mapang ama dang Philippines indang Exclusive Economic Zone nung inyakangshitsü shiogo.

Kasa mapang nung G7-ia Hokolbarnü China-i iba jenjang agiba atema aitsüogo.

South China Sea ya Vietnam, Malaysia aser Brunei nung atema-a kanga tongtibang lir aser tesem kar nungbo parnoka China den mangatettep lir.



Italy PM Giorgia Meloni-i summit tenzüka anogo G7 züingsemtem ajak pelashishia agizükba liasü. G7 Summit nung British Prime Minister Rishi Sunak densema linük balala lenirtemi shilem agidar.



Hokolbarnü Euro 2024 nung Group A nung Scotland goal 5-1 agi akokba sülen Germany nunger asayatem pelatepba noksa nung angur. Iba asaya nung Germany team atema Florian Wirtz, Jamal Musiala, Kai Havertz, Niclas aser Can nungeri goal kaka idakja liasü.

Taoba Arsenal & Everton striker Campbell süogo

Aami/June 15, 2024 (Agencies): Taoba mapang Arsenal aser Everton striker Kevin Campbell mapang tatsüka shiranga aliba sülen arishi küm 54buba nung süogo. Campbell asaya aliba mapang club ti nungi asayadang pai asaya 542 nung goal 148 idakja liasü.

Pa Arsenal nungi asayaba mapang tongtumbang asayamung pezü akok aser pa Leyton Orient, Leicester, Nottingham Forest, Trabzonspor, Everton, West Brom aser Cardiff nungia asayaogo.

Campbell tatemsa 2007 küm February ita asaya aser iba sülen broadcasting nung career tenzüka liasü.

Everton-i iba ita tetenzüklen sangdong ka ajanga, pa May ita shirang tenzük aser temang kanga mejungi mozüki nung lir ta shia liasü.

"Taoba mapang onok striker Kevin Campbell mapang

tatsüka shiranga liyar asüba osang angazüka onok temulung raksar," ta Arsenal-i sangdong ka ajanga ashi.

"Kevin ya club nung ajaki kanga sakloka liasü. Mangyim jashia mapang onok ajaki par medemer aser kinungertem bileteter. Kevin na yimjung nung anisüngzükang," ta kasa sangdong ajanga metetdaksü.

Kasa mapang nung Everton-ia, "Everton dak sendaka alir ajak onok indang taoba mapang striker Kevin Campbell arishi küm 54buba nung asüba osang angazüka kanga temulung koremer," ta ashi.

Arsenal indang youth set-up nung asaya tenzükba sülen, Campbell mezüng club indang senior team nungi 1988 küm asaya. Pa Leyton Orient aser Leicester nunga loan nung oa asaya liasü.

1990-91 season nung Arsenal puri Premier league

akokba mapang pai goal 22 idakja liasü.

Campbell-isa, 1993 küm Arsenal puri FA Cup aser League Cup akokba aser 1994 küm European Cup Winners' Cup akokba nung teyari tulu agütsü.

Iba sülen pa Forest puri 1995 küm alizük aser pa iba club nungi season asem asayaba mapang tatembangbuba season nung pai asaya 39 nungi goal 22 idakja club Premier League-i promote asüba nung teyari agüja liasü.

Turkey nung Trabzonspor nungi mapang tatsüka asayaba sülen pa 1999 küm March ita loan nung Everton-i ao aser Premier League nung tatembangbuba asaya ti nung pai goal teku idakja Everton pur relegate asütsü aliba nungi kümzük.

Campbell tatemsa West Brom aser Cardiff nungi asaya liasü.

Mumbai City FC-i forward Noufal P.N alizükogo



Noufal P.N

Aami/June 15, 2024 (Agencies): Mumbai City FC-i sangdong ka ajanga Noufal P.N den tenangzüktepba yangluba sangdongogo. Mumbai City FC aser Noufal na küm asem atema tenangzüktepba yangluogo aser pa club nungi 2027 season tashi asayatsü.

Arishi küm 23 tain asayar ya mezüng Basco FC nung asaya tenzük aser iba sülen pa indang hometown club, Gokulam Kerala FC-i 2022 küm ao. Iba sülen Kerala nunger asayar ya team nung yakta dang aden aser pai assist tajung sütsüba aser goal idaktsüteta asayaba ajanga

team nung asayar tongtumbang ka aküm.

Noufal-i pa indang sempet ya India nung asayamung balala nung sayuogo, kong I-League, Kalinga Super Cup, aser Durand Cup nunger densema lir.

Pa ya forward asayar ka lir aser wing nung pai kanga kara asayatetba ajanga ajaki pa jangjar. Pa atema tashi tulutiba kaji goal idaktsütsü atema külem asayatem nem ball agütsütetba ya asütsü.

Gokulam Kerala FC nungi asayaba mapang pa asaya 53 nung asaya aser goal pongu idaktsü aser assist 14 süja liasü,

aser iba ajanga pa taruba season nung Mumbai City pur attacking unit nung tongtumbang asayar ka akümtsü.

Noufal P.N-i ashiba agi, "Mumbai City FC ya India nung takok tajungtiba anguba club rongnung ka lir aser ni parnok den adenba atema kanga pelar. Iba club jersey semer asayamung tulutiba nung asayatsü atema maongka anuba ya kü nükjidong atalokba ka lir. Ni asayar ka ama renlokyonga aotsü aser Coach Petr Kratky den inyaktsü yongyaseta atar. Ni team nung densema club den jenjang tasen ka agütsü yongyaseta atar."

Kasa mapang nung coach Petr Kratky-i ashiba agi, "onoki Noufal mapang tatsüka asadanga aruogo aser pa Mumbai City FC-i pelashishia agizüker. Pa kanga kara asayaba asayar ka aser külem asayatem nem ball yanglutsütsü atema pa tasa ya ozü team atema kanga senti asütsü. Pa team nung dena külemi inyaktsü atema yongyaseta atar."

Hi-i junior men's national coaching camp atema asayar 40 shimogo

Aami/June 15, 2024 (Agencies): Hockey India-i Honibarnü, taruba junior men's national coaching camp atema asayar 40 agi kümteba core probable group dak sangdongogo. Iba camp ya Sports Authority of India (SAI), Bengaluru nung June 16 nungi tenzüktsü.

Junior men's team May 20 nungi 29 tashi Europe nung oa Belgium, Germany, aser Netherlands club team Bredase Hockey Vereniging Push nunger den asayaba sülen tang iba camp akatsü.

Europe nung oa asayaba mapang India team-i mezüngbuba asaya nung 2-2 (4-2 SO) agi Belgium akok saka tanabuba asaya makok. Iba sülen parnoki goal 5-4 agi Bredase Hockey Vereniging tera agi makok. Germany den asayaba mapang mezüngbuba asaya parnoki goal 2-3 agi makok saka tanabuba asaya 1-1 (3-1 SO) agi koka liasü.

Taruba camp ya coach Janardhana C B lenisüba nung Hockey India's High Performance Director Herman Kruis-i achaayanga agütsü. Camp ya anogo 63 agütsü aser August 18 nü tembangtsü.

Taruba camp indang jembiba mapang coach Janardhana C B-i, "tarütsü nung international asayamung balala atema renema atatsü asoshi iba camp ya kanga tongtumbang lir. Team nung sempet tajung aketba asayatem lir aser training kanga junga agütsüba ajanga parnoki parnok sempet



tajungtiba amshitetsü atema teyari agütsütsü. Onok nükjidongji tayongzükba aser tetsükdaktsütem koktetyonga aotsü atema renema aliba team tashi tait ka tentetsü asoshi lir," ta ashi.

Asayatem:

Goalkeepers: Prince Deep Singh, Bikramjit Singh, Ashwani Yadav, Adarsh G, Ali Khan

Defenders: Sharda Nand Tiwari, Sukhvinder, Amir Ali, Rohit, Yogember Rawat, Manoj Yadav, Anmol Ekka, Prashant Barla, Akash Sorong, Sundaram Rajawat, Anand Y, Talem Priyo Barta

Midfielders: Ankit Pal, Rosan Kujur, Thounaojam Ingalemba Luwang, Mukesh Toppo, Thokchom Kingson Singh, Ritik Kujur, Ankush, Jeetpal, Chandan Yadav, Manmeet Singh, Vachan HA, Govind Nag, Bipin Billavara Ravi

Forwards: Mohit Karma, Sourabh Anand Kushwaha, Arajjeet Singh Hundal, Gurjot Singh, Mohd. Konain Dad, Prabhdeep Singh, Dilraj Singh, Arshdeep Singh, Mohd. Zaid Khan, Gursewak Singh.

Olympic qualifier: India Archery team temaba jenjang nung tembang

New Delhi, Aami/June 15 (Agencies): Indian men's recurve archery team nung Tarundeep Rai, Dhiraj Bommadevara, aser Pravin Jadhav nungeri Honibarnü Olympic Qualifier tatembangbuba nung 24-team elimination round nung temaba jenjang nung tembanga liasü.

Parnok asem senteper point 2018 angu aser parnoki Chinese Taipei (2008) aser Germany (1998) team na ajateta temaba jenjangi atu.

Asayamung nung shilem agia aliba team 46 nungi temaba jenjang nung aliba team 24 elimination round-i ia liasü.

Elimination round nung temaba jenjang nung tembanga sülen India team bye angu aser parnok round of 16 nung seed 17buba nung aliba Luxembourg den asayatsü.

Tebur recurve team event Elimination round tembanga sülen temaba jenjang nung aliba linük team asem Paris Olympic atema quota angütsü.

India team temaba jenjang nung aliba team asemrongnung tembangtetra parnok indang individual quota ya team quota-i ajungkettsütsü. Temetetsü kaji Dhiraj-ibo iba asayamung nung individual quota ka nguteter lir.

Kasa mapang nung Indian women's recurve team, nung Deepika Kumari, Bhajan Kaur, ser Ankita Bhakat nunger Hokolbarnü pre-quarterfinals nung Ukraine team-i tsükdaktsüogoo aer ibayongji parnok quota mongutet.

Ajisüka tetsür team Paris Olympics cut-off anogo matong tsüingda parnok indang rankings dak ajemdaker qualify asütsü maongka lir.

BILEMDANGANG

"Takok asa toktepdang tashiyim tamshi."